

Pengerusi tegaskan : Tak benar MCA Kelantan lemah

KOTA BHARU, Isnin — MCA Kelantan hari ini menafikan beberapa laporan mengatakan parti itu lemah di negeri ini berikutan penjelajahan beberapa tokoh Gerakan di beberapa tempat di sini baru-baru ini.

Pengerusi MCA Kelantan, Datuk Dr. Wee Khoo Hock membuat penafian ini dalam pertemuan dengan Berita Harian di sini hari ini. Berikutan spekulasi menyatakan MCA Kelantan mulai lemah dengan memasuki pemimpin dari Gerakan Pusat ke sini.

Menerima

Datuk Dr. Wee berkata, hanya 7 orang ahli MCA yang menyertai Gerakan setakat ini, itupun ahli biasa saja dan pemimpin MCA tidak seorang menyertainya.

"MCA Kelantan tetap kukuh dan padu di bawah pimpinan saya. Kalau Gerakan mahu cari ahli baru, kita juga bersedia menerima ahli baru," jelasnya.

"Baru-baru ini MCA Cawangan Wakaf Siku

dekat sini menerima 100 ahli baru dan mungkin sebulan dua lagi kita akan adakan satu upacara menerima lebih 1,000 ahli baru MCA di sini," ujar Datuk Dr. Wee.

"Amatlah bohong menyatakan, hanya tinggal orang tua sahaja dalam MCA. Kita ada ramai tokoh muda, ramai antara mereka yang berpelajaran tinggi," tegas beliau.

Pengerusi MCA Kelantan itu menambah, Gerakan susah hendak masuk ke Kelantan.

Mengenai masyarakat China dan Thai yang dikatakan ramai keluar menyambut dan menghadiri perjumpaan-perjumpaan anjuran Gerakan, beliau memberi contoh, ahli UMNO yang mengikuti ceramah PAS, "mereka mahu mendengar ucapan saja, pegangan mereka tidak berubah," katanya.

Beliau berkata, setakat ini MCA Kelantan tidak bimbang pengaruh Gerakan yang dikatakan mula menular ke sini.

Bahan asal dari Arkib
Negara Malaysia